

Lè viyo budzon

Décors : on pêyo

Accessoires : une machine à coude - un sac militaire - des cartons - 3 tables
avec chaises ou tabourets et des tissus.

Personnages : Fonse

Finon

Agathe

Marie

Julon

Un journaliste

Marie : (En ramassant les tissus, faisant de l'ordre, elle s'adresse au public)
Vo vèdè to chi bordel ke li a pêr inke. Vo j'ithè in trin dè vo
dèmandâ yo no chin è chin k'on pou fikâ din on pariè ni !!! ... è bin
no chin din on pêyo, yo ouna binda dè retrètâ de la Kotse chè
rètravon ti lè demâ du midzoua po pachâ le tin è fère di tsoujè
djuchto po le pyéji. Ho, bin chur, ou velâdzo, li a di dzin ke no
prênyon po di j'écharvalâ. Le chindik no ja batchi "lè viyo budzon"
pachke no puyin pâ chobrâ ouna vouarbèta chin rin fère.

Fonse : Marie, tâ pâ yu mè bêrihyo ?? (il les a sur le nez)

Marie : Na ! Tâ pâ fota dè tè bêrihyo, te lè betè rinthyè po yère la Grevire, è
te châ pra k'ora tâ otyè d'otro a fère.

Fonse : Vouè, ma kan mimo, âmèri bin chavê yo chon !

Marie : Ma, mon Fonfon, te keminhyè a pèdre la bola ! Motse-tè è te lè
travèri tè bêrihyo.

Fonse : (Il se mouche) Ha mè bêrihyo (et il sort)

Marie : Lè vré k'avui lè j'an, la mémoire fo le kan ache rido tyè l'ardzin.

Fonse : (en entrant) Te châ pâ yo lè le kuti k'inpyè po tsapuji tè karton ?

Marie : Na, ma yê tâ tyâ on kounol, te lâ achurâ oubyâ a la lodze !

Fonse : Ma bin chur è lé onkora oubyâ dè betâ a chètchi la pi (il sort)

Marie : (au public) Ha vo dyo, lè j'omo chin lou fémalè, chon vuto pardu. No
lè j'an pout-hitre on bokon tru vouathâ. Ma tiè voli vo, no chin tan
bounè ...

Fonse : (en entrant) Inke mon kuti n'in dari fota tota l'ara po tsapuji tè karton

Marie : Vouè, lè dza duvè j'arè min on kê, Agathe è Finon dêvon arouvâ !

Fonse : D'habitude, lè Julon ke lè le premi. Lè j'arè lè lè jârè !

(On frappe)

Marie : Intrâdè !

Agathe et Finon : Salu Marie, salu Fonfon
 Marie : Salu salu
 Fonse : Avo lè pevolè dou Koujinbê !
 Agathe : Lè on bokon tâ po no prindre po di pevolè ...
 Marie : Te châ kemin lè mon Fonfon, la totavi j'ou dou pyéji a gabâ lè fèmalè
 Fonse : Tè achebin lé du tè gabâ dèvan dè tè mariâ
 Marie : I fâ pyéji a oure, la mémoire tè rèvin !
 Fonse : I mè rapalo le premi kou ke té bayi ouna dzouta, irè a l'abrèvyà, ouna demindze né dou mi dè mé, kan te rintrâvé di konpli !
 Marie : Ora, pyaka tié !
 Fonse : (au public) Lé veré ke lè chovinyi lè on bokon kemin lè j'infanè din l'ou bri, fo lè gugâ chin lè rèvèyi
 Finon : Adon, lè vouè ke chi grâta papê dè la Grevire va vinyi po fère on artikle chu nouthrè j'okupachiyon dè viyo budzon ?
 Fonse : Vouè, vouè, i dê arouvâ din ouna vouarbèta
 Agathe : Ma, Julon lè pâ inke !!
 Marie : Lè drolo, d'abitude lè to dè gran le premi !! Fonfon, va vèrè ch'arouvè !
 Fonse : Vouè, vouè (il sort)
 Finon : Vo chédè pâ tiè ? Lé moujâ a otiè !
 Marie : Dyû châ l'invinthyon ??
 Finon : E bin, kan chi journalichte cherè inke, no van li mothrâ chin ke no chan fère. Bin chur, è apri, po ke no j'ochan nouthra foto din la Grevire, no van li propojâ on dèfilé de mouda !
 Agathe : D'akouâ, ma no fudrè achebin prindre Julon avui no.
 Marie : Te tè krè ke Julon cherè d'akouâ dè mothrâ chin ke la fê por alâ a la pètse ?
 Agathe : Vé dza mè tsardji dè le dèchidâ.
 Marie : E bin d'akouâ.
 Agathe : Kan iro dzouna, l'aré tan amâ avè on kou ma foto din na gajèta !
 Finon : Bin, chti kou, avui la roba ke tâ fê, te cheri la pye bala !!
 Agathe : Vouè, ma lè on bokon tâ !
 Marie : Te châ, lè pâ po chin ke ti chobrâye viye fiye (entrent Julon et Fonfon)
 Julon : Avo lè damè
 Les dames : Salu Julon !
 Julon : Chu pâ in avantho, lè a kouja dou bouébou a Fèlon. I dê alâ a l'inpachyon è li mankvè duvè thinlyè, la gorde è on piti chatsè. Kemi i châ ke lé vouardâ ti mè j'afère dè chudâ, m'a demandâ dè li prèthâ chi komarche. Chu pachâ li portâ chin è bin chur, lè du bère ouna poma ... è nouthron grâta papê lè pâ inke ??
 Fonse : Na, ma i dè arouvâ to tso.

Finon : Ma dévan k'arouvichè, no dèvin tè dre otiè. No j'an moujâ ke por avê nouthra foto din la Grevire, no fudrè fère on dèfilé ...

Julon : On dèfilé militêre ?

Finon : Na, na, on dèfilé kemin on dèfilé de mouda.

Julon : Ma, chin lè oun afère de fèmalè !

Marie : Ma, no volin pâ dèfelâ kemin hou fèmalè ke te vè chu lè kataloge !

Julon : A vo ji invade de li mothra vouthrè geniyè, ché pâ ch'oujèrè fère ouna foto

Agathe : Lè po chin ke tè fo vinyi avui no, kan i varè ton bi kostume de pêchenê, chin li bayèrè invi de de fère on artikle de duvè pâdzè.

Finon : Ma vouè, no fo li mothra ke no chin pâ di retrètâ kemin ti lè j'otro!

Agathe : Adon, Julon, ti d'akouâ de vinyi avui no ?

Julon : Che chin vo fâ pyéji, chu d'akouâ ma i oudri dévan è vo martsèri ou pâ !

Finon : (A Agathe) E bin tè le châ dévejâ i j'omo. Konprênyo pâ portiè chobrâye viye fiye ???

Julon : Mè panyi

Agathe : Pyaka Julon, te mè fâ lè pomètè totè rodzè
(On frappe)

Fonse : Inke nouthron jounalichte.

Journaliste : Bon dzoua, chu bin vè lè viyo budzon ???

Tous : Ma vouè. Bondzoua moncheu le jounalichte !!

Fonse : Mè, chu Fonse è ma fèna Marie. Ora ke lè j'infan chon lavi pè Dzenèva, no j'an on mache de pyathe è no j'an déchidâ d'inyèyi chi pèyo po lè viyo budzo, ch'ta dre lè retrèta de la Kotse ke l'an invade de fère otiè de lou man ke fachè pyéji Otiè ke l'an djamè j'ou liji de fère din lou ya.

Journaliste : E bin, chin fâ pyéji a oure. I vèyo vo ithè ouna binda d'artichte !!!

Julon : (Il prend position) Julon apointé mitrayeu Katre tiyindzè mil dzoua de mob.

Journaliste : E bin vo ji de la tsanthe de pâ fère partia d'armé vintyion

Finon : Bondzoua bondzoua moncheu, mè chu Finon. Lè dzin mè dyon la rapathe di loto

Journaliste : E bin, vo fédè on chakré numèro ???

Marie : (au public) Vouè, i gânyè chovin, ma le pâ chiâ ke ramènè ouna kuchola ou bin on patyè de biskui po lè kat'arè.

Finon : E ha brâva fiye lè Agathe.

Agathe : Bondzoua moncheu le jounalichte

Journaliste : Bondzoua madama. (en sortant de quoi écrire) Vère vo, lè pâ la matèrè ke manké por inpyâ ouna pâdze de la Grevire. Che vo j'ithè d'akouâ, vè dèmandâ a tsakon de m'echplikâ chin ke vo fikâde po vothon piyéji.

Finon : D'akouâ. Keminhyidè pèr mè pachke lé on mache dè tsoujè a vo dre !!!

Journaliste : (au public) Po chin, lè gayâ pèr to parè, lè fèmalè l'an totavi prà a dre !!

Finon : Vêdè vo, chu on bokon kure di loto nin dé la radze.

Journaliste : Vo ji la radze, ma, chin chè choniyè a l'ara d'ora.

Finon : Pâ la rdze di renâ, la radze dè gânyi. A lè journalichte, vo j'ithe ti parè, no fo fère intinthyon chin kon di, vo veridè to de la krouye pâ.

Journaliste : Ma na, irè djuchto po vère vouthra rèakchion.

Finon : Che vo ji invide dè rèakchion, vo j'alâdè ithe chervi. Fo pâ mè prindre po na toka !

Journaliste : Vo ji réjon, fo dzamè prindre lè fèmalè po di tokè ma bin po chin ke chon.

Finon : Adon, mè, chu la rapathe di loto. Chu djamé rintraye chin avui ganyi ou mintè ouna kine !

Journaliste : Vo ji achurâ on chèkrè, vo fo mè le dre.

Finon : Vo dètè chavè kon chèkrè chè di pâ, ma vé kan mimo vo dre otiè. Lé fê di chtatichtike, pu vo dre ke le numéro nonanta, i cho chovin, le yon achebin kan lè cholè. Apri, li a le djijèvouète ke mè bayè prou chovin tsanthe

Journaliste : Le djijèvouète pachke lè achurâ l'an ke vo ithè viniyète ou mondo ?

Finon : Ma toparè, tiè ke vo krêdè, lè pâ vouètantè chat an, ni dé chaptantè dou

Journaliste : Lè dzuchto chin ke mè fo chavè (il écrit) Finon chaptantè dou j'an, fèkala alègra è dègadja, la linvoua bin pindya ...

Finon : Nin da ke diyon ke le chuchantè nà, lè on farmo bon numéro, ma a mè mè konvin pâ. Portan, on pou pâ le konfondre avui le nonantè chè tié-dè

Journaliste : Vo j'i achurâ proumatère dè pyéji avui lè j'otro numéro

Finon : Bin chur, li a le chaptantè dou, le vintè-katro, le vouètantè-chè. Ma, mon pye gran piyéji, lè dè vouadâ ti lè karton ke lè gânyi !

Journaliste : E vo j'in fédè tiè ?

Finon : Avui lè méya, féjo di tablo è lé Fonse ke mè fâ lè kadro. Vê dè nin dé du trè inke (elle les montre, ils sont suspendus au mur) Lè j'otro, lè kajo chu de la matère por in fère di kouvètè ou di redyô

Journaliste : Chin lè otiè kon na djamé yu !

Julon : Finon, ora pyaka, no achebin no j'an otiè a mothra !!!

Finon : Bon vo lécho, ora a tè dè tè gabâ.

Journaliste : E bin tiè fédè vo avui to chi barda ?

Julon : Vo j'é dza de, lé fê mil dzoua dè mob. E i âmo to chin ke lè militère. Lè pratike, cholido è bin fê. Ha kan iro ou chêrvicho, irè lè pye bi dzoua dè ma ya. Lè po chin ke lé vouardâ ti mè j'afère. E prà dè mè kamerâdo man bayi lé là.

Journaliste : Vouê, ma chin lè dou matériel viyo è péjan !

Julon : Ma, ... cholido ... inusable, .. lè pâ de la bourtyâ in plachtik, ... lè pâ fabrekâ avui de la pétroliche.

Journaliste : Adon tiè fédè vo avui to chin ??

Julon : E bin, ti lè kevihyo di gamel, lè j'inyêyo po fère di pyati po bayi a medji a mè tsa.

Journaliste : Vo j'in dê vouéro

Julon : Ché pâ tru bayo a medji a ti lè tsa ke vinyon miyolâ dèvan la méjon.

Journaliste : Vo j'i bon kâ, ma chin i kothè tyê dè nuri ouna kobya dè tsa

Julon : O i atsito djémé ouna bouèthe dè« vuiskats ». Mè vé a la pètse, lé chovin tru dè pèchon, adon, lè bayo i tsa. Fo vère kemin i âmon chin

Marie : Mè achebin i amo l pèchon!

Julon : T'â pâ ouna pila proumatêre grocha po lè kouêre

Journaliste : A vo j'intindre, vo j'ithè on vretâbyo pèchenê.

Julon : Ora ke fèjo rinmé dè chêrvucho. Mon pye gran pyéji, lè la pètse kan i fâ bi tin, lè dè vinyi inke kan le tin i bonyè

Journaliste : Avui voutha ya de chudâ è dè pèchenê, vo j'i achurâ on mache dè chovinyi a no kontâ !

Julon : Ho poré vo j'in kontâ tota na véya.

Marie : Te vou pâ rèkeminhy a no kontâ tè rangênè. No lè konyin dyora pèr ka.

Julon : (au journaliste) Achtâdè vo. Vo j'in konto ouna djuchto po le pyéji: Irè in mil nouthin karanté dou. Iro i frontêrè de la pâ dè Valorbe. Iro cholè, in trin dè pojâ la gârda a la ruva dou bou, pè lè trè j'arè dou matin, irè mâre né a choroyivo, vèyé rin. To d'on kou, intindo ouna chèta, kemin kokon ke troupâvè din di foye. Lé prè mon fuji, lé déjachurâ, prè a fère fu. Chin la dourâ ouna bounè àra è kan le chèla l'a keminchi a ch'abadâ de la pâ di j'almandè, lè yu chin k'irè ...

Journaliste : Ha vouê, tiè ?

Julon : Irè dou irchon ke chè tserkotâvan din on tsiron dè foyè !

Journaliste : Vo j'i du avê ouna chinta pouêre !

Julon : Vo dyo pâ n'in gurlo adi

Fonse : Di fariboulè dinche, nin da di dzijannè a vo vo kontâ !!!

Marie : Te fari mi dè li mothrâ chin ke t'â fê avui ton viyo cha è tè monètyâ dè kandriyè !

Julon : (au journaliste) Mè chu fê ouna tinya dè kamouflage échprè por alâ a la pètse. Lè pèchon mè vèyon djémé arouvâ !!

Journaliste : Améri bin vère chin ?

Julon : Vé alâ la tsertchi.

Journaliste : Chin mè farè bin pyéji, è vo, Marie, tiè fédè vo avui ti hou karton ?

Marie : Mé, lé tota ma ya j'ou invide dè mè dèdjijâ po le kamintran dè Bro. Po chin, mè fo fère on costume k'on na djèmè yu è le Fonfon ke ma bayi l'idé

Journaliste : (au public) Dyu châ l'invinthyon (à Fonse) Tiè ke vo fikâdè avui ti bou dè karton ?

Fonse : Bin, lé po lè fruchkè a Marie. Lè dzin trominton gayâ to, adon lé rapartchi koutiè karton. Lè tsapujo por in fère de la matère.

Marie : E mè, lè kâjo po fère chin ke lé invide.

Journaliste : (au public, en montrant un morceau de carton) Lè veré ke lè otiè k'on na djamé yu. Ma avui chin, fo pâ chayi on dzoua dè pyodze ou dè bije nêre. (à Marie) Che vo j'i invide d'alâ ou kamintran dè Bro, vo chabrè pâ tan dè tin

Marie : Ma, le costume ke lé fê po chti yan, lè prè du grantin.

Journaliste : Cherè on pyéji dè chin vère !

Marie : Che lè po vouthron pyéji, mè dèkarkacho to tso (elle sort s'habiller)

Journaliste : E vo, Agathe, vo j'i rin de du ke chu inke, tiè fèdè vo din ha kobyà ?

Agathe : Lé djamé chu bin dèvejâ.

Journaliste : (au public) Chin lè drolo po na fèmala !

Agathe : Lè pou-t-îthre po chin ke chu chobraye viye fiye ?

Journaliste : A vo vère, lè matyan l'an pâ du vo mankâ

Agathe : Na, ma, kan irè le momin dè rèyi l'avan gayâ tré ti trovâ bota a lou pi

Journaliste : I vèyo, vo j'ithè on bokon gormanda !

Agathe : Pâ pire, ma che fo pachâ tota cha ya avui on omo k'achin mo è dètèna, râva !!

Journaliste : Kemin di le rèvi, mârya tè mârya tè pâ, te tin rèpintri !

Agathe : E ora, lé invide dè mè dèvergondâ on bokon. Lé Marie ke ma de che tâ invide dè tè dèboubenâ, vin avui no.

Journaliste : Tiè fèdè vo po vo dèvergondâ ?

Agathe : Vo j'alâdè rire, kajo di boton è infelo di parlè. Chu in trin dè fère ouna roba por alâ ou té danthan ou Pafouè.

Journaliste : Lè kan chi té danthan ou Pafouè ?

Agathe : Ti lè dzoua de la premire chenanna dè ti lè mê, a duvè j'arè.

Journaliste : (au public) Hou k'organijon hou té danthan chon malin. Moujâdè, totè lè premirè chananna di mê, on pou pâ alâ i tsanpinyon. Adon, ti lè retrètâ ke l'an la medzèjon de la pâ di pyotè van danhyi. (à Agathe) E bin, le premi demikro dou mi dè mâ, i oudri ou thé danhan rintyè po vère vouthra roba !

Agathe : Ho ! Che lè rintyè po ma roba, vé vo la motrà ora (elle sort)

Fonse : Vo ithe d'akouâ, no chin ouna binda dè retrètâ on bokon dèrandji de la bola !!!

Journaliste : Ma na, chin fâ pyéji dè vère di j'anhyan chuti dzoyà. E vo, vo j'ithè kokon dè rethèta moujâdè vo betadè a dichpojichyon on pèyo po tota ha kobyà d'artichte. Chin chè travè pâ ti lè dzoua : Vo mertâdè bin ouna pâdze din la Grevire.

- Fonse : Mon pye gran pyéji, lè dè dèvejâ patê, to in fajin otiè po mè pachâ le tin. Dèvan, i fajé di fago, ma ora nion mé l'an di forni in molache. Adon, chu to kontin dè mè rètrovâ avui ha binda.
- Journaliste : Vo tsapujidè di karton po Marie, ma, chin lè tiè (en montrant la passoire)
- Fonse : Lé fê chin po rire. Chin lè on koyà po pachâ le tin
- Journaliste : A vouê è ch'inyêyè kemin?
- Fonse : L'inyêyo kan chu cholè. Vo vèdè le kadran, lè tsêgè budzon pâ, le tin ch'arithè. Adon, m'achito è vouêto ou fon dou koyà. I vèyo tota ma ya è le koyà ratin tiè lè bon chovinyi. Adon, mè rèvèyo infanè, in trin dè fère di fâchè. Ou bin, kan iro dzouno, in trin dè kortijâ ma Finon. E le premi kou ke l'avé yu, chè dzèna, moujâdè, in chi tin, kan on avé yu lè dzèna dè cha grahyaja, on avé fê on fyê tro.
- Journaliste : Vouê, irè pâ kemin ora. Ora, on vè mé dé tsê tiè dè pantè !!!
- Fonse : Lè po chin ke lé dou pyéji a rèbuyi le fon dou koyà po rètrovâ mè bon chovinyi.
- Journaliste : Vo j'ithè on poète !!
- Fonse : Fâchèya d'akouâ, ma pâ poète !
- Journaliste : In ti lè ka, vo chédè prindre la ya de la bouna pâ. E hou botoyè veryè chin dèchu déjo, tiè èthe?
- Fonse : Chin, lè po lè jojalè, levê
- Journaliste : Vo betâdè lè jojalè din lè botoyè ?
- Fonse : Ma na, vé vo mothâ. Prênyo on lantsè, féjo on pèrtè de la grochyâ dou boutson. Beto le boutson dedin. Prênyo la botoye, féjo du trè pèrtè par inke. Inpyo la botoye dè grannè é la viso chu le lantsè é inke chin fâ on gournê po lè jojalè. Adon, du ma fenitha, levê lé le pyéji dè lè vère chè tserkotâ ou toua dou gournê.
- Journaliste : Chin lè to chinpyamin mèrvèyeu ne ko l'ari moujâ dè prindre ouna botoye in plachtik po fère on gournê i jojalè. Vo mertâdè duvè pâdze chu la Grevire. (Pendant ce temps, Fonse installe la mangeoire) Ma yo chon pachâ ti lè j'èmi ???
- Fonse : Van pâ tardâ a arouvâ. I pyaton dè pyéji de vo mothrà lou invinthyon
(entre le pêcheur) Inke le pèchenê ...
- Julon : Vo vèdè, avui le cha lé fê di tsothè, lè pratike, on pou to fotre dedin, le tsapi lè on tro dè felè dè kamouflaje. Dinche, lè pèchon puyon pâ mè rèkonyièthe!
- Fonse : (au public) Vouê du yin, on derê on tron puri ...
- Julon : È ora po atrapâ on pèchon, rin dè pye chinpyo, fo chè tyiji, pâ fère dè chète (il lance la canne à pêche derrière les coulisses, côté cour) è inke on bi pèchon
- Journaliste : E bin, vo j'alâdè fère di dzala, ma por ora tinyidè lè pèchon di duvè man, vé fère ouna foto

Julon : D'akouâ, ma vé le tinyi pè la kuva, i parèthré pye gro !

Journaliste : (au public) Ha lè pèchenê chon bin ti parê. Budjidè pâ mothrâdè bin vouthron pèchon, tak inke ouna bala foto

Fonse : Vouè, pachke chon vè pâ le pèchon, lè dzin van krêre ke lè on pyâno frèjâ pè Lotar. E ora, va tsertchi Marie

Marie : (en traversant la scène) Tiè ditè vo de ma tinya po le kamintran dè Bro ??

Journaliste : Vo kouâjo ke pyovechichè pâ chi dzoua, cheri vretâbyamin damâdzo d'avi fê to chi travo po rin ... Vo j'arê pâ tru tso, vo farâ mi d'alâ ou kamintran dè Rio !

Marie : Râva po Rio, lè a Bro ke vu alâ. E i pya djémè ou kamintran dè Bro, i fâ di kou on bokon frê. E lé pâ pouère dou frê, me n'omo mè di chovin ke chu on jachon.

Journaliste : Ma, avui chi kostume, vo j'alâdè rètsoudâ bin di j'omo !!

Marie : O !! Lé bin pachâ le tin d'atuji le fu, ma a kamintran, lè pèrmi dè rètsoudâ lè hyindrè !

Journaliste : Inke, budjidè pâ, vé fère la foto.

Marie : Mè fo betâ ouna pyota chu l'échkabi.

Journaliste : Na na, li a proumatère a vère chin chin. (klic klac)

Marie : E ora, vé tsertchi Finon. Vo j'alâdè vère, lé on bon numéro !!!

Finon : (en traversant la scène avec son caddie et son porte-bonheur)
Vé vou dre chin ke lé gânyi chti levê :
A Sorin, on mache d'adzin
A Trivo, on cha dè cho – chin lè bon po lè j'âno
A Tsarmè, on mochi dè tsê è on kilo dè mé
A Morlon, on pan dè bakon
Ou Patchi, ouna bouêthe dè bréchi
A Vouadin, on karton dè vin
E a Bulo, le gro lo thin hin fran.

Journaliste : E bin, apri to chin ke vo j'i gânyi, è chi dzakiyon in numéro, on pou bin vo dre le rapathe di loto. Lè a kouja dè chi l'atiraye ke vo j'i de la tsanthe !!!

Finon : Vé vo j'échplikâ : Vêdè hou dou kayon ke fojenon chin lè ma machkote. Inke lè mon hyindrè pachke fâmo pra kan dzuyo. Inke lè ma réjerva dè blètse. Chin lè ma remache po lè rapartchi.

Journaliste : Avui to chin, vo fudrè alâ ou salon di j'invinthyon !

Finon : Lè pâ to, vèdè ma kariola !

Journaliste : Vouè, on derè on novi tonbero.

Finon : Kan gâniyo pâ vouéro beto mon komêrche inke (dans le petit) E kan i gâniyo on mache, lè tiè a déchindre la remorke.

Journaliste : Chin vo achebin ouna foto (klac) E bin chti kou, no j'an to yu !!!

Finon : Ma na, vo j'i onkora pâ yu Agathe (elle sort)

Journaliste : Lè pâ tyathon d'oubyâ la mis boton

Agathe : (elle traverse la scène en se dandinant, marque une position, pose, ...)

Journaliste : (au public) Chin lè pye chiyâ Boulonye tiè Pafouet

Agathe : Adon, vo vindri ou thé danthan demiko ke vin ou Pafouet ? (elle pose le pied sur la chaise)

Journaliste : Ché pâ che l'ari fournê me n'artikle, ma chti kou vé fère ouna foto in kola.. Fonse, fédè vinyi tota la kobyà.

Fonse : (en appelant) Julon, Mari, Finon, vo j'ithè prè po la foto ?

Tous : (en entrant des 2 côtés) Ma bin chure !!

Fonse : E ora, on pou chavè chin ke vo alâdè betâ chu vouthra biyota ?

Journaliste : Vé fère a vayê totê vouthè j'invinthyon avui du trè foto. E po fourni deri ke né djèmé rinkontrâ di retrètâ ache chuti dzoyà è damâ tiè la kobyà di viyo budzon.

Fonse : Vo pouédè achebin betâ : Che nin da de la kotse ke volon fère partya de la kobyà di viyo budzon, chon lé bin vinyê, a kondihyon...

Tous : dè dèvejâ patê.

Journaliste : (fait des photos)

GE, le 3.10.2004 NONO.

